

Wujudkan Yayasan Kepimpinan Malaysia

UM - 4 NOV 2003

KUALA LUMPUR 3 Nov. — Kelab Penyokong Kerajaan (BBC) mencadangkan supaya diwujudkan Yayasan Kepimpinan Malaysia untuk mengkaji falsafah kepimpinan semua Perdana Menteri Malaysia dari zaman Almarhum Tunku Abdul Rahman hingga kepada kepimpinan Tun Dr. Mahathir Mohamad.

Ahli Parlimen Barisan Nasional (BN), Datuk Ruhanie Ahmad ketika berucap mewakili BBC membahaskan usul penghargaan dan ucapan terima kasih terhadap bekas Perdana Menteri berkata, yayasan itu akan membolehkan falsafah Perdana Menteri Malaysia dijadikan sumber perbandingan dunia dan dimanfaatkan untuk permodenan dan pembinaan tamadun negara membangun.

“Yayasan ini sewajarnya menaja, merangsang serta menggalakkan seluruh sarjana, ilmuan, intelektual, pemimpin dari pelbagai sektor dan bidang pengkhususan termasuk keagamaan, siasah dan korporat dari seluruh dunia mengkajinya.

“Mudah-mudahan jangkauan global menerusi yayasan ini akan menjadikan seluruh falsafah kepimpinan kesemua Perdana Menteri Malaysia sumber permodenan dan pembinaan tamadun negara-negara membangun, sumber mensensasikan ideologi dan agama lain dengan keunggulan Islam serta sumber kewujudan susunan dunia mutakhir yang lebih aman dan saksama,” katanya.

Dibicarakan

Menarik perhatian kepada Perdana Menteri Malaysia Keempat, beliau berkata, gaya kepimpinan dan falsafah perjuangannya telah dibicarakan secara meluas oleh banyak pihak di seluruh dunia termasuk yang dijelmakan menerusi kritikan semberono dan fitnah.

Namun menurutnya, sebilangan besar mengabadikan segala-galanya mengenai Ahli Parlimen Kubang Pasu dalam bentuk sanjungan menerusi buku-buku yang menjadi sumber inspirasi, pemikiran dan sumber ilmu kepada manusia sejagat.

Tambah beliau, Dr. Mahathir sendiri banyak mendokumentasikan karya pemikiran beliau dalam ratusan ucapan, kertas kerja, makalah dan buku.

“Seluruh kebijaksanaan yang terpancar dari gaya kepimpinan, falsafah perjuangan, bentuk pengorbanan, corak pemikiran, curahan jasa, budi dan bakti bekas Perdana Menteri yang telah diabadikan dalam semua bentuk itu pasti akan menjadi khazanah tidak ternilai manfaatnya kepada perkembangan sejarah dan pembentukan tamadun negara bangsa Malaysia moden.

“Seluruhnya juga pasti akan menjadi sumber inspirasi kepada masyarakat antarabangsa dalam usaha memunculkan satu dunia yang lebih saksama, aman dan sejahtera di dunia,” katanya.